

ROZÁRIU HO LAUDATO SI' – MISTÉRIU DOLOROZU

Mistériu 1 – Jezús nia agonia iha to'os Oliveira

“Violénsia ne'ebé iha ema nia fuan, no fuan ne'ebé kanek tanba sala, mosu momoos iha sinál moras oioin nian iha rai, bee, anin no kriatura sira tomak. Tan ne'e, iha ema kiak-sira nia leet, ne'ebé ema hewai no haterus, ita bele sura mós ita-nia rai, ne'ebé ema hanehan no sobu rahun, no «hakilar tanis hanesan feto ida ne'ebé atu tur ahi» (Rm 8,22)” (LS 2).

Jezús lori ita hotu nia salan sira, nia terus ho ita-nia kanek sira, hadomi ita to'o kosar raan iha Jetzémani: nia lori ita-nia terus, nia salva ita no haraik nia moris mai ita atu ita iha moris iha abundánsia. Maria, Kreda nia Inan, Sarani sira nia Tulun, hamriik iha nia Oan nia sorin iha silénsiu. Hodi simu ninia saran an tulun ita moris iha mundu ne'e iha rekonsiliaun no Maromak no sai maun no biin-alin ba ema hotu.

Mistériu 2 – Ema baku Jezús to'o isin sai kanek

“Ita haluha katak ita rasik mós rai-rahun (haree Gn 2,7). Ita-nia isin-lolon mós halo hosi elementu-sira planeta nian; anin fó iis mai ita, no bee fó moris no isin di'ak” (LS 2.5).

Iha Jezús nia isin nakonu ho kanek nia oin, Mesias inosente, ne'ebé saran nia moris tan domin mai ita, ita hakarak medita presu ne'ebé nia hodi selu ho ni aisin atu salva ita... Kriatura hotu folin liu moris hotu mak presente ida, ne'ebé ita labele trata aat. Ita husu Maria, Kriasaun nia Inan no Liurai-Feto, ne'ebé ko'us Na'I iha nia knotak virjinál, atu tulun ita sai defensora sira moris nian, dignidade nian, respeitu ba kriatura hotu, tanba sir amak reflexu Kriadór nian.

Mistériu 3 – Ema le'u aitarak tau iha Jezús nia futarulun

“...ambiente naturál nakonu ho kanek boot sira ne'ebé ita-nia hahalok la responsável mak provoka; ambiente sosiál rasik mós iha ninia kanek-sira. Maibé, iha jerál, sira hotu mosu tanba buat aat ida-de'it, mak hanoin katak la iha lia-loos indiskutível ida-de'it atu ukun ita-nia moris, nune'e liberdade umana la iha limite” (LS 6).

Kontempla Jezús ho aitarak ihaulun, ita rekoñese momentu hotu ne'ebé ita uza ita-nia Liberdade laho loos, hodi estraga kriasaun, relasinamentu sira, ambiente. Jezús husik ema hatún nia maski nia Liurai, nune'e, hodi hateke ba Nia ita labele haluha ktak iha iha Aman ida, no ita hotu mak ninia kriatura sira, la'ós autoreferensiál, maibé dependente ba ninia domin ne'ebé kria ita. Ho Maria Sarani sira-nia Tulun, ita hakarak aprende loroloron atu uza didi'ak ita-nia Liberdade atu hari'i mundu ida umana liután, ekolojikál liután, iha-ne'ebé ita bele moris iha dame, tulun malu, atu iha ita-nia uma komún ita bele hananu hanesan nia: “Ha'u-nia klamar hahí Na'i nia kmanek sira”.

Mistériu 4 – Jezús lori krús ba faho Kalváriu

“Proteje ita nia uma-komún sai dezafiu urjente ne'ebé inklui preokupasaun atu halibur família umana tomak hodi buka desenvolvimentu ida ne'ebé sustentável no integrál, tanba ita hatene katak ita sei bele halo mudansa. Kriadór sei la hewai ita, nia la fila kotuk ba ninia projetu domin nian, no nia la hakribit ita tanba Nia mak halo ita. Umanidade iha mós kapasidade atu tulun harii ita-nia uma-komún” (LS 13).

Jezús molok mate, lori ninia no ita-nia krús sira. Nia lori buat hotu ne'ebé ita la tau interese, soe iha dalan, no ho domin enfrenta Kalváriu. Ni amós husik atu Simaun Sireneu tulun nia, no mós nia Inan hamutuk ho Nia, akompaña nia, terus ho Nia. Maria mós akompaña ita ohin, tulun ita hari'i sivilizasaun

iha-ne'ebé domin mak ukun. Maria, Kriasaun nia Inan no Liurai-Feto, harohan atu ita bele lori ba oin projetu komún domin nian ne'ebé nia Oan hahú, hodi la lakon esperansa.

Mistériu 5 – Ema hedi Jezús iha krús

“Situasaun sira-ne'e provoka biin rai nia halerik, ne'ebé halibur hamutuk ho abandonadu-sira mundu ida-ne'e nian, hanesan lamentu ne'ebé ezije hosi ita rumo seluk. Ita la trata aat no hakanek ita-nia uma-komún hanesan ita halo iha sékulu rua ikus ne'e. Maibé ita simu bolu atu sai Aman Maromak nia instrumentu sira atu ita-nia planeta bele sai buat ne'ebé Nia mehi bainhira halo nia no bele tuir ninia projetu dame nian, beleza no plenitude” (LS 53).

“Kapás tebetebes serteza ida-ne'e katak ema ida nia moris la lakon iha kaos ne'ebé halo ema lakon laran-metin, iha mundu ida ne'ebé buat arbiru mak ukun ka síklu ne'ebé repete ho sentidu la'ek! ...Maromak halo ita iha nia fuan laran, tan ne'e, «ita ida-idak mak ai-fuan ida hosi Maromak nia hanoin. Maromak hakarak tebes ita ida-idak, Nia hadomi ita ida-idak, no ita ida-idak nesesáriu duni»” (LS 65).

Kristu nia mate iha krús, hahalok aas liut domin nian mai ita, salva ita. Iha Nia no hodi Nia, kriasaun tomak moris hikas ba moris foun, no ita hotu hamutuk ho Nia. Ita husu Maria, Sarani sira-nia Tulun, ne'ebé hamri'ik meton iha krús hun, fiél nafatin ba ninia Oan, tulun ita komprende domin boot ne'e no korresponde ho ita-nia moris, hodi serví maluk sira, no ita-nia Inan Rai, tan domin ba Na'i.